

Transplantaziun d'organs: Ina dumonda sensibla

Il cussegl dals chantuns fa opposiziun

DA LUCAS DEPLAZES / ANR

■ **Il cussegl dals chantuns tschenta la clera voluntad dal pazient en il center. El ha refusà la proposta d'ina minoritad che vuleva persupponer il consentiment per la prelevaziun d'organs sch'il singul pazient n'ha betg documentà sia opposiziun.** En il center da la discussiun davart la transplantaziun d'organs umans stat la dumonda centrala tranter spender veta e respectar la vountad e la dignitad da la veta umana. La medischina da perfecziun lubescha da spender e da prolungar la veta cun diversas mesiras e metodas. Cler che la speranza sin in organ crescha en vista a las pussaivladads medicinalas. Ord quest motiv ha il parlament formulà ina lescha davart la transplantaziun d'organs umans che è entrada en vigur il prim da fanadur 2007. Quella lubescha ina prelevaziun d'organs – per abitants en Svizra – mo en cas ch'il pazient ha dà ses consentiment, e quai or da libra voluntad. Scu-mandà è scadin commerzi cun organs umans.

Dapi in temp pretendan politichers midadas en favur da promover la donaziun d'organs. En ina moziun propona cusseglier naziunal *Laurent Favre* (pld/NE) ina midada dal sistem da lubientscha. N'han ni il pazient ni ils confamigliars decidì cunter ina prelevaziun, duai quella da princip esser lubida. Il cussegl naziunal ha approvà quest princip cun 102 cunter 65 vuschs senza manar ina debatta pli profunda surlonder. Divers exponents han fatg attent a las bunas experientschas en auters pajais sco per exempel en Spagna.

Discussiun ed infurmaziun

Il cussegl federal propona dentant da mantegnair la schliaziun actuala e da promover la donaziun cun ina meglra infurmaziun. Da la medema idea è er la cumissiun dal cussegl dals chantuns. Sco quai che sia pledadra, *Christine Egerszegi-Obrist* (pld/AG), ha punctuà



Tenor il minister da la sanadad publica, Alain Berset, vul il cussegl federal mantegnair la schliaziun actuala.

KEYSTONE

en la debatta d'entrada dubita la maioritad da la cumissiun che quai saja la buna via. En vista a la muntada da la dumonda saja necessaria ina discussiun ed ina infurmaziun pli vasta en la populaziun. Er la cumissiun per etica haja votà cunter la midada e fatg attent che quella na portia betg il success giavischà. *Urs Schwaller* (pcd/FR) è dal parairi che ina prelevaziun d'organs balsegnia la clera approvaziun dal singul. En tals cas sa tracti d'ina intervenziun en la libertad ed en la integritad d'in carstgaun ed el tschenta la dumonda sch'i dat insumma in dretg sin in organ ester?

Midada da cultura

Felix Gutzwiller (pld/ZH), il pledader da la minoritad, fa attent al grond manco d'organs. Actualmain spetgan

var 1100 personas sin in organ. En Svizra datti mo tranter 60 ed 80 donaziuns d'organs l'onn. La tendenza dals ultims onns saja schizunt negativa. Tenor ses parairi stoppia er vegnir rsguardà la midada da mentalitad, da cultura en nossa communitad. Tgi che giavischia in organ ester saja er pront da metter sez a disposiziun ils agens organs. Quai saja uss la nova norma sociala, ha accentuà Gutzwiller. En cas ch'in document manchia hajan ils confamigliars l'ultim pled. *Liliane Maury Pasquier* (pss/GE) pretenda ils medems dretgs er per ils cunfinaris.

Tenor il minister da la sanadad publica, *Alain Berset*, vul il cussegl federal mantegnair la schliaziun actuala. La regenza è dentant cunscienza da la situaziun da mancanza. Tar la revisiun da la lescha vul il cussegl federal lubir da

prender mesiras medicalas da preparaziun per ina prelevaziun. En sias strategias per la sanadad 2020 ha il cussegl federal previs ina acziun speziala per infurmar e per motivar il pievel en favur d'ina donaziun d'organs. El è persvas che quella via ha in meglier success che ina midada tar il sistem d'opposiziun. Berset ha punctuà la gronda rolla dals ospitals per pudair persvader la glieud dalla necessitad d'ina donaziun e constatà che S. Gagl haja recaltgà il dubel d'organs en cumparaziun cun Türitg.

Cun 24 cunter 18 vuschs ha il cussegl dals chantuns refusà la proposta da la minoritad ed acceptà la revisiun parziala cun 41 vuschs, senza opposiziun. Ussa sto il cussegl naziunal sa fatschenttar da nov cun la dumonda.

➤PUGN DA VISTA